

1. Adventus

Tempo advent, hahu liutiha sema Kristo Liurai nian, iha semana (domingu) haat nia laran too 24 de Dezembru. Husi dia 16-24 ita hahu novena ba Natal. Iha tempo ne'e se diak liu, ema hotu-hotu ba halo novena iha Parokia.

Importante iha adventu mak, Tempo hein nia, hakribit sala no iha esperansa. Hanoin kona ba Nain nia mai ba dala uluk tempo hanesan hein mos ba fila hikas mai/ fila mai ba dala ikus. Nune'e nudar sarani pronto atu hasoru Jezús iha momento iis kotu, no fila hikas mai nu'udar Juiz.

Prepara an, hodi hakribit sala (konfesa) atu ita soin ba festa Jezús nia moris, Maromak halo An ba Ema. Nune'e hakribit sala no hadame malu, pratika fiar importante iha preparasaun ba festa ida ne'e.

Iha Adventu nia laran; nu'udar tradisaun, tau lilin haat besik altar. Dala ruma tau iha ai-tahan ka aifunan halo roda/ kabuar nia laran. Roda hatudu la iha rohan, lilin haat simboliza etapa historia salvasaun nian no nia lakan mak hatudu Kristo nu'udar mundo nia naroman.

Lilin sira ne'e iha tolu koor ungu no ida koor pink. Koor pink ne'e refere ba semana datoluk, ka domingu Gaudete (ksolok). Domigu ida-idak la iha nia reglamento, maibe dala barak domingu uluk adventu nian temi domingu Patriarka sira nian, hodi fo importansia liu ba esperansa; domingu daruak adventu nian domingu profeta sira nian, hodi fo importansia liu ba damen; domingu datoluk domingu S. João Batista nian, hodi fo importansia liu ba ksolok; no domingu ikus adventu nian domingu Nain Feto nian, hodi fo importansia liu ba domin. Se iha celebraun halakan lilin nian karik, halo uluk molok misa.

Buat ne'ebé labele halo iha tempo adventu; la bele reza ka hananu Gloria iha Misa.

Iª semana Adventu

Tema katekese: Kiak Mak, Livre Husi Isin Nia Hakarak

Objetivo

Atu labarik sira brani husik isin nia hakarak sira

Atu labarik sira buka hafoun sira nia moris spiritual

Atu labarik sira hadook an husi buat ne'ebé dada sira ba sala.

Proseso

Orasaun maklole; hodi Padre,

Hananu:

MAI, MAI, NA'I JESUS

281

Mai, mai, Na'i Jesus; mai Na'i, ami hein Ita.

Mai, mai, Na'i Jesus; lalais, hiit an mai.

1. Rai ne'e mate malirin;
Ami klamar lakon nia manas.
Maun alin la hadomi;
Rai ne'e la iha domin.

Esperensia humana

Iha eskola ida, professor sira, husu ba alunus sira atu prepara sira nia presente ba Jezús, basa tempo Natal mai dadaun ona. Nune'e professor sira dehan; ema ida-idak mak lori sira nia presente, labele fo tuir ba ema seluk. Tenki buka presente be furak liu, ba Jezús. Labarik ida habesik ba nia kolega no husu, kolega presente saida mak ita lori ba Jezús? Kolega ne'e dehan; ita lori kaderno no lapis. Atu Jezús hakerek ita nia naran iha laran.

Labarik ne'e hakbesik fali ba professor no husu; professor presente saida mak diak ba Jezús be ha'u tenki lori? Professor hatan; tenki estuda atu hetan valor diak iha exame! Wainhira ó pasa exame Jezús kontente.

Labarik ne'e ba misa iha domingu dader, nia hare Padre Paroko nia husu tan; Padre, presente saida mak diak ba Jezús be ha'u tenki lori? Padre Paroko hatan, tenki reza, konfessa, hatudu kompotamento diak iha uma no eskola. Wainhira ó halo ida ne'e Jezús sei kontente ho ó.

Ba uma nia husu fali ba nia mama, mama ha'u tenki lori presente saida ba Jezús iha Natal mak mai? Mama hatan; labele halo tuir deit ó nia hakarak maibe, rona ema boot sira (mestre/a, katekista, maun, bin, apa, amam) nia hanorin no halo tuir sira, labele halo tuir tamba tauk, maibe halo tuir tamba hadomi sira.

Perguntas

1. Labarik ne'e nia kolega dehan saida ba nia?
2. Professor dehan saida ba labarik ne'e?
3. Padre Paroko dehan saida ba labarik?
4. Mama dehan saida ba nia oan?
5.

Evanjellu

Markus 13 : 24 – 37.

Oan Mane hiit An mai

²⁴Maibe iha loron sira ne'e, susar boot sira ne'e hotu tiha, loron sei sai nakukun, fulan sei lakon nia naroman, ²⁵fitun sira sei monu housi lalehan, no kbiit lalehan nian sei nakdoko hela. ²⁶Tuir mai, sira sei hare housi kalohan sira Oan Mane hiit An mai ho kbiit no kmanek wa'in. ²⁷Nia sei haruka anju sira atu halibur hamutuk sira nebe Nia fihir ona, housi lorosa'e no loromonu, tasi fetu no tasi mane, housi rai ikun no rai ulun, to'o lalehan nia rohan."

Hanorin ida housi ai figueira

²⁸Housi ai figueira, imi hatene ba aiknanoik ida ne'e: wainhira nia sanak sai mamar no dikin sira mosu, imi hatene katak bainloron to'o ona. ²⁹Nune'e mos, wainhira imi hare buat hirak ne'e mosu, hatene ba katak tempu to'o ona mai, besik ona odamatan. ³⁰Tebes, Ha'u dehan ba imi, molok otas ne'e liu tiha, buat hotu ne'e sei mosu tiha ona. ³¹Lalehan ho rai sei liu tiha, maibe Ha'u nia liafuan sei la liu."

Ema ida la hatene loron eh oras

³²Kona ba loron eh oras, ema ida la hatene; anju sira mos iha lalehan no Oan Mane rasik la hatene. Aman deit mak hatene. ³³Loke matan ba! Matan moris ba, hodi resa, basa imi la hatene wainhira tempu ne'e sei to'o mai. ³⁴Buat ne'e, nudar ema la'o rai nebe husik nia uma hodi haraik kbiit ba atan sira, fahe knaar ba sira ida-ida no haruka ida nebe hein odamatan atu sai matan moris neon na'in. ³⁵Ne'e duni, matan moris neon na'in ba, basa imi la hatene wainhira uma na'in sei mai: iha loraik, iha kalan fahe rua, iha rai hun mutin ka iha dader; ³⁶atu wainhira nia teki-teki mai, nia la hetan imi dukur hela. ³⁷Buat nebe Ha'u dehan ba imi, Ha'u dehan ba ema hotu: matan moris ba!"

Haklean Evanjellu

1. Se mak sei hiit an mai, ho kbiit no kmanek?
2. Jezús dehan; Lalehan ho rai sei liu tiha, maibe... saida mak sei la liu."?
3. Kona ba loron eh oras semak hatene?
4.

Resumo

Alin sira, iha istoia ita rona kona ba labarik ida nia preukupasaun, atu lori presente ba Jezús. Istoria ne'e hanorin mai ita, atu oras ne'e ita keta hakmatek deit, maibe buka prepara presente ba Jezús, basa loron ninia moris nian besik ona. Presente, ohin ita rona iha istoria, ema oi-oin mak hatan, no fo sujestaun ba labarik atu lori saida, no halo saida. Presente, laos buat ne'ebé ita tenki lori, maibe bele mos buat be ita tenki halo hodi hatudu, ba mestre ka papa, ama no kolega sira iha uma ka iha eskola. Ne'e mak saida; la baku malu, la lori lia bosok ba ema boot eh maluk kikoan sira, la tanis ba osan wainhira ba eskola, la tanis ba brinkedos, la tanis ba ema nia pisang gorng, nsst. Iha uma, molok hader reza, molok han no han hotu reza, hadomi mama, hodi tulun mama, foti etu ba meja, fase no foti bikan husi mesa, dasa rai, buat hirak ne'e mak presente diak ba Jezús. Halo buat hirak ne'e, laos hein atu ama ka papa selu, katak tenki fo osan, lae, labele. Se nune'e karik ne'e laos ona presente ba Jezús maibe faan ita nia serbisu ne'e. Nune'e ita halo laos tamba tauk, bin ka maun eh ama no papa siak ita, lae. Se nune'e karik ne'e laos presente, maibe ne'e taukten ida. Maibe ita halo tamba ita hakarak halo nunda'ar presente ba Jezús.

Iha evanjellu dehan tenki matan moris, tan ne'e la bele dehan, aban bain

rua lai mak ha'u halo, oras ne'e sei dook. Keta halo. orsida Jezús liu iha ó nia uma atu hare ó ka foti presente husi ó, ó ladauk pronto, nune'e Nia liu tiha deit. Aban bain rua, ó prepara Jezús la mai ona, tamba Nia liu ona. Tan ne'e prepara oras ne'e kedas keta hein loron aban bainrua nian. Aban bain rua ó sei tarde.

IIª semana Adventu

Tema Katekese: Kiak mak; Livre Halo Tuir (Obedese ho Liberdade)

Objetivo

Atu labarik sira halo tuir (obedese) ho sira nia liberdade
Atu labarik sira hatene tenke obedese/ laran metin ba se.
Atu labarik sira pratika laran metin iha sira nia moris

Proseso

Orasaun : Hodi Padre,

Hananu: **KRISTU HARAİK FO LIBERDADE** 244

Kristu haraik fo liberdade, Kristu haraik fo salvaun

Kristu haraik laran metin, Kristu haraik nia domin.

1. Na'i Maromak haraik paz no lialos, ha'u hetan diak.

Nia hasai ema hotu nia krus, ha'u hetan diak.

Fo mai ha'u, Na'i, Ita lia; rona ha'u Na'i ha'u orasaun

2. Ha'u perdua ha'u nia maluk,

Na'i Jesus perdua ha'u.

Ha'u hadomi moris tuir dalan los, ha'u hetan Nia.

3. Ha'u tuir dalan, dalan ksolok,

dalan los, tuir dalan los.

Ha'u hadomi ema fuik, ema leet ha'u Na'i ninian.

Esperensi umana

Iha famlia balun iha Timor laran ne'e, sira hare malu la diak, nune'e sira la naran lao ba mai, liu-liu boot sira. Sira bandu mos sira nia oan sira atu la bele halimar hamutuk. Wainhira iha festa ruma, sira hafuu malu, se familia ida iha uluk ona, familia ida seluk la ba ona festa ne'e. Sira nia moris hanesan ne'e lori tempo naruk nia laran.

Loron-loron labarik sira ba eskola hamutuk, iha eskola ida, tama hamutuk iha sala ida. Nune'e, labarik sira labele nonok deit, maibe sira halimar hamutuk, koalia ba malu, estuda hamutuk, haksoit tali hamutuk, tebe bola hamutuk, sosa es sira fahe ba malu, nune'e ba oratorio mos hamutuk. Hanesan ne'e wainhira

eskola feriado, no laos loron oratorio nian, sira hela iha uma, sira buka malu no halimar hamutuk.

Hodi sira nia halimar hamutuk ne'e, nei-neik dada fali ema boot sira atu koalia ba malu. Labarik sira ne'e mak halo dalan ba ema boot sira, atu nakfilakan, no halo ema boot sira hadame malu fali.

Perguntas

1. Istoría iha leten koalia kona ba saida?
2. Família sira ne'e hela iha ne'ebé?
3. Se mak halo ema boot sira hadame malu fali?
4.

Evanjellu

Lk 3: 1-20

Joao Baptista nudar manuain

¹Iha tinan sanulu resin lima liurai boot Tiberio nia ukun nian, wainhira Poncio Pilatos mak emboot iha rai Judeia, Herodes liurai iha rai Galileia; Filipe, Herodes nia alin, liurai iha Itureia no Trakonitide, no Lisania liurai iha rai Abilene; ²wainhira Anas ho Caifas mak hala'o knaar amlulik boot nian, Na'i Maromak nia lia tun ba Joao, Zacarias nia oan, iha rai fuik maran. ³Joao la'o lemo rai besik mota Jordao nian, hodi haklaken baptizmu atu hakribi sala hodi hetan perdua, ⁴nudar hakerek ona iha livru profeta Isaias nian dehan:

“Lia ida hakilar iha rai fuik maran:

‘Hadia Na'i nia dalan!

Halos Na'i nia dalan inuk!

⁵Taka tiha rai klean hotu!

Hatun foho tomak, aas no badak!

Halos dalan kleuk!

Halo kaberdalan aat hotu!

⁶No ema tomak sei hare Maromak nia maksoin!”

⁷Ne'e duni, nia dehan ba ema lubun boot nebe mai atu simu baptizmu housi nia: “Imi samea nia oan sira! Se mak hanorin imi atu halai housi hirus nebe atu mai dau-daun? ⁸Imi buka hatudu ho hahalok katak imi hakribi duni imi nia sala. Keta hahu hateten ba imi an rasik: “Abraao mak ami nia aman”; basa ha'u dehan ba imi katak housi fatuk sira ne'e, Maromak bele fo oan sira ba Abraao. ⁹Ohin kedas baliun iha ona ai abut sira. Tan ne'e, aihun nebe la fo fuan sei tesi tiha hodi soe ba ahi.”

¹⁰Ema lubun boot husu ba nia: “Ami sei halo sa los?” Nia hatan: ¹¹“Ema nebe iha hatais tahan rua, fahe ho maluk nebe la iha; no ema nebe iha aihan, halo mos nune'e.” ¹²Publikanu sira mos mai atu simu baptizmu. Sira husu ba Nia: “Mestre, ami sei halo sa los?” ¹³Nia hatan ba sira: “Imi keta husu impostu liu ida

nebe estadu haruka.” ¹⁴Soldadu sira mos husu ba nia: “Be, ami sei halo sa los?” Nia hatan: “Keta hanehan ema, keta duu matak ema, simu deit ho laran imi nia kolen.” ¹⁵Tan povu hein namanas, no sira hanoin iha sira nia laran katak Joao mak Kristu karik, ¹⁶Joao hatan ba sira hotu dehan: “Ha’u sarani imi ho be, maibe Ida nebe maka’as liu ha’u sei to’o mai ona. Ha’u la soi atu kore nia sapatu tali. Nia sei sarani imi ho Espiritu Santu no ahi. ¹⁷Nia kaer ona lafatik atu saar halo mos nia klobur, hodi halot Nia hare iha hoka: maibe Nia sei sunu tiha hare kain iha ahi nebe sei la mate mohu!” ¹⁸Ho lia barak seluk, Joao hamanas povu no haklaken ba sira liafoun diak. ¹⁹Maibe Herodes nebe Joao si’ak tamba nia hola Herodiade, nia alin nia kaben, no mos tamba buat aat seluk nebe nia halo, ²⁰Herodes hawain liu tan nia hahalok aat sira hodi hatama Joao iha dadur laran.

Perguntas

1. Profeta Isaias hakerek saida iha ninia livru?
2. Wainhira soldadu sira husu ba S. João Batista, ami sei halo saida?
3. S. João hatan saida?
4. Tamba sa, S. João siak ba Herodes?
5.

Sumario

Iha istoria ita rona kona ba, familia sira hirus malu, maibe ikus mai sira nakfilak –an hadame malu fali tan, labarik sira nia hahalok, ka labarik sira mak dada nia inan aman atu hadame malu fali.

Iha Evanjellu ita rona kona ba, ema nain hitu be S. Lukas temi iha kapitlu datoluk evnjellu be nia hakerek, sira ne’e iha kbiit politiku, ekonomia, no relijiaun iha Israel. Sira nain hitu mak; Romano nia boot Kaisar, Ponssiu Pilatus, Herodes, Filipi no Lisantias, hamutuk ho nailulik boot Hanas no Kaifas. Wainhira sira sei kaer ukun, “Maroomak hatoo nia liamenon ba João iha raifuik maran. Nune’ João lao ba fatin oi-oin iha Jordaun laran hohi haklaken nune’: ‘nakfilak an ba no fo an atu sarani basa Maromak sei perdu imi salan’.

Ema ida be kiik no kiak, la kaer ukun sei halo diferesia saida wainhira rona Maromak nia Liafuan, hodi hasoru ema hirak be kaer ukun ne’e nakonu ho kbiit? Oinsa sa ema ida be la importante bele troka situasaun? Ninia reposta ita bele rona husi S. João Batista nia haklaken kona ba nakfilak-an, tamba Mesias atu mai dadaun (16,17), no ni asuwain kontra Herodes (19). João simu knar, atu hadiak Na’i nia dalan, Na’i Maksoin no mundo sei hetan salvasaun liu husi Ninia fidelidade.

Oras ne’e ita nu’udar labarik be sarani, ita presisa, atu tulun ita nia inan aman sira, hanesan istoria dehan. Tempo hanesan sai hanean S. João Batista, haklaken no haksiak ema seluk wainira sira halo sala. Sala mak saida; hahalok be ita halo no hatudu, la tuir Maromak nia hakarak hanesan ita aprende iha ukuun fuan sanulu no moral be Kreda hanorin.

Semana III^o

Tema Katekese: Kiak mak; fo an ba ema seluk nia salvasaun
Objetivo

Atu labarik sira la bosok, brani koalia lialos
Atu labarik sira iha hakarak tulun familia sira iha uma
Atu labarik sira, tulun familia sira la hein atu selu

Proseso

Orasaun : Hodi Padre,

ITA HANANU HAKSOLOK

280

1. Na'i Jesus, ami ba hakbesik Ita,
Atu husu paz, paz be Ita haraik;
Atu husu domin, moris ho perdaun
Be lori ami ba salvasaun

***Ita hananu haksolok, harohan,
Maranatha, no moris neon metin,
Aleluia, hakilar ba mundu; Kristu sei mai. (2x)***

2. Na'i Jesus, ami ba hakbesik Ita,
Ita mak moris, Maromak, dalam los;
Ita mak ksolok, kbiit no lialos.
Ita hametin ami nia ksolok.
3. Na'i Jesus, ami ba hakbesik Ita,
Ita ami nia kmanek,
kbiit no aten b'rani;
Ita mak belun los ba nafatin.
Ita hametin ami an tomak.

Espernsia humana

Wainhira Indonesia sei ukun iha Timor Leste, Timor oan sira fahe ba rua, pro TNI balun pro Falintil. Iha loron ida, TNI nia boot obriga Timor oan ida (A) atu oho Don Carlos Filipe Ximenes Belo, SDB, tanba Don Carlos koalia bei-beik kona justisa, nune'e kritika beibeik Indonesianu sira. Timor oan seluk (B) rona ida ne'e la kontente, nia buka atu soi Don Carlos, husi ema ida be TNI nia boot husu atu oho Don Carlos ne'e.

Loron ida, sira hasoru malu iha merkadu laran, nia (B) oho duni (A) ema be atu oho Don Carlos ne'e. Maski nia senti katak nia bele ono, oho ona A, antinji duni nia objetivu maibe, nia halai la bele tamba ema barak mak hare nia (B), nune'e TNI ba buka nia iha nia uma. Se nia halai lakon karik, nia familia mak sei mate iha nia fatin. Atu salva nia familia sira, nia fo an deit.

TNI kaer nia, baku, suku, tebe, no hatama nia iha komarka laran, lori nia ba kastigu iha Kupang, too independensia mak husik fali nia, fila mai iha Timor.

Perguntas

Timor oan B halo saida, wainhira nia rona TNI nia planu ba Carlos?

Tansa mak Timor oan la halai lakon?

Timor oan B soi, Don Carlos no nia familia, nia konsekuensia mak saida?

.....

Maromak nia futarlifuan

Jo 1: 19-28

Joao fo sasin kona ba nia an

¹⁹Ne'e mak Joao nia sasin wainhira Judeu sira housi Jerusalem haruka amlulik no levita sira atu husu nia: "O se los?" ²⁰Nia dehan sai, la heli lia maibe simu dehan: "Ha'u la'os Messias." ²¹Sira husu ba nia: "O se los? O Elias?" Nia hatan, "Lae." "O Profeta?" nia hatan: "Lae." ²²Ne'e duni, sira husu nia: "O se los, atu ami bele fo liafuan ba sira nebe haruka ami mai. O dehan sa ida kona ba o nia an rasik?" ²³Nia hatan: "Ha'u mak lia nebe hakilar iha rai fuik maran. Halos Na'i nia dalan, nudar profeta Isaias dehan." ²⁴Sira ne'e fariseu sira mak haruka, ²⁵sira husu ba nia dehan: "O la'os Messias, la'os Elias, la'os profeta: nusa mak o sarani ema?" ²⁶Joao hatan ba sira dehan: "Ha'u sarani ho be, maibe iha imi nia leet iha Ida nebe imi la hatene, ²⁷nebe ha'u la soi atu kore nia sandalias tali." ²⁸Buat ne'e mosu iha Betania, iha mota Jordao nia sorin ba, iha nebe Joao sei sarani hela.

Perguntas

João dehan saida kona ba nia an?

Wainhira sira ba João kona, tansa nia sarani ema nia hatan saida?

iha imi nia leet iha Ida nebe imi la hatene, liafuan ne'e, refere ba se?

....

Sumario

Alin sira se ita rona istoria ohin, koalia mai ita kona ba, ema ida hakarak salva Don Carlos husi TNI nia odio. Iha Evanjellu hatoo mai ita kona ba fo sasain. Atu halo salva ema seluk, ita preisisa fo an (hakarak ho neon no laran tomak), la hanoin rua-rua. Ha'u halo maibe, keta nia hirus ha'u karik, keta nia koho ha'u nia belun karik, ne'e la iha iha deit mak ha'u hakarak. Nune'e atu fo sasain; exemplo, la bosok, la tauk ema ida dehan lia loos ne'e. Laos hanoin keta, ha'u dehan mak; nia baku ha'u karik, keta nia hirus ha'u karik, hanoin hanesan ne'e la iha.

Nune'e keta tauk, sai Kristo nia sasin iha moris lor-loron nia, maski ema seluk hamoe ó, hodi bolu santu. *Animador fo exemplo; sai sasin Kristo nian iha moris!*

*Boas Festa
do Santo Natal no tinan foun 2015*